

Na osnovu člana 8. stava 3. Zakona o principima lokalne samouprave u Federaciji Bosne i Hercegovine («Službene novine FBiH» broj 49/06, 51/09), člana 13. stava 3. Zakona o pripadnosti javnih prihoda u Federaciji Bosne i Hercegovine i finansiranju F BiH («Službene novine FBiH», broj 22/06, 22/09) i člana 21. Statuta Grada Visoko («Službeni glasnik Grada Visoko», broj 10/21), Gradsko vijeće Visoko, na 13.sjednici, održanoj 27.12.2021. godine, donijelo je

ODLUKU O KOMUNALNIM TAKSAMA GRADA VISOKO

I OPĆE ODREDBE

Član 1.

(osnovi za plaćanje takse)

Na području grada Visoko propisuju se i naplaćuju komunalne takse za:

1. Svaku istaknutu firmu,
2. Priređivanje muzičkog programa u ugostiteljskim objektima,
3. Privremeni boravak u hotelima i drugim objektima registrovanim za odmor i noćenja,
4. Zauzimanje trotoara ispred poslovnih prostora i drugih slobodnih javnih površina
5. Priređivanje zabavnih igara i igara na sreću ,
6. Isticanje objava, oglasa i saopštenja na javnim mjestima

Član 2.

(definicija pojmova)

U smislu ove Odluke,

1. pod istaknutom firmom podrazumijeva se ime pod kojim pravno ili fizičko lice posluje,
2. pod priređivanjem muzičkog programa u ugostiteljskim objektima podrazumijeva se povremeno ili svakodnevno izvođenje muzičkog programa uz pružanje ugostiteljskih usluga,
3. pod privremenim boravkom u hotelima i drugim objektima registrovanim za odmor i noćenja podrazumijeva se privremeni boravak do 30 dana u objektima, registrovanim za odmor i noćenja te kod građana koji izdaju sobe – ležaje turistima,
4. pod zauzimanjem trotoara ispred poslovnih prostora i drugih slobodnih javnih površina podrazumijeva se postavljanje stolova ispred ugostiteljskih radnji, postavljanje stolova, pultova i tezgi za prodaju ili reklamu roba i usluga, postavljanje zabavnih parkova (luna park) koje se vrše od mjesta do mjesta,
5. pod priređivanjem zabavnih igara i igara na sreću podrazumijeva se priređivanje zabavnih igara gdje nije predviđen novčani dobitak i igara na sreću putem predmeta, elektronskih ili mehaničkih aparata, slot-mašinama, koji tokom igre ne omogućuju igraču dobit u novcu ili žetonima koji su naplativi u novcu, priređivanje igre kladenja na sportske rezultate i druge izvjesne događaje,
6. pod isticanjem objava, oglasa i saopštenja na javnim mjestima podrazumijeva se isticanje plakata, panoa, postavljanje stalnih panoa i display-a na javnim mjestima određenim za te namjene.

Član 3.

(način utvrđivanja obaveze)

Utvrđivanje obaveze, razrez i naplata komunalne takse vršit će se prema odredbama Tarife o komunalnim taksama sadržane u članu 14. ove Odluke.

Član 4.

(obveznici)

Obveznici komunalne takse su sva pravna i fizička lica registrovana za obavljanje djelatnosti, koja posluju na području grada Visoko i koja koriste predmet, prostor ili pružaju uslugu za čije korištenje je propisano plaćanje komunalne takse.

Član 5.

(isticanje firme)

Pravna i fizička lica koja obavljaju djelatnost na osnovu odobrenja nadležnog organa dužna su na vidnom mjestu svih prostora gdje obavljaju djelatnost istaknuti naziv firme. Pod nazivom firme podrazumijeva se: naziv firme pod kojim je takseni obveznik registrovan kod nadležnog organa, sjedište lica kao i broj, odnosno naziv poslovne jedinice kada se firma ističe na poslovnoj jedinici. Firma se ističe najkasnije danom početka obavljanja djelatnosti.

Član 6.

(oslobađanje od plaćanja komunalne takse)

Od plaćanja komunalne takse iz člana 1.tačke 1. i 6. oslobađaju se:

1. Bosna i Hercegovina , Federacija Bosne i Hercegovine,Kanton i Grad,
2. Sudski i pravosudni organi,
3. Javne ustanove iz oblasti odgoja i obrazovanja, prosvjete, nauke, kulture, informisanja, zaštite kulturne i prirodne baštine, zdravstva (osim privatne zdravstvene prakse), socijalne zaštite i vjerske zajednice,
4. Javna preduzeća koja obavljaju proizvodnju i distribuciju vode za piće, odvoz i zbrinjavanje komunalnog otpada za potrebe građana; pogrebne usluge i veterinarsku zaštitu
5. Sportska udruženja osim profesionalnih,
6. Političke partije,
7. Udruženja građana ako ne obavljaju privrednu djelatnost,
8. Humanitarne organizacije,
9. Savezi i organizacije ratnih vojnih invalida, porodice šehida i poginulih boraca i demobilisanih boraca, udruženja dobitnika najvećih ratnih priznanja i udruženja logoraša i porodice civilnih žrtava rata
10. Nevladine organizacije,
11. Samostalni privrednici-invalidna lica sa tjelesnim oštećenjem od najmanje 70% uz nalaz i mišljenje nadležne institucije.
12. Privredna društva za zapošljavanje lica sa invaliditetom koja imaju utvrđen status društva za zapošljavanje lica sa invaliditetom, a na osnovu rješenja Ministarstva za rad i socijalnu politiku FBiH /privredna društva koja imaju sjedište na području grada Visoko/

II PRIJAVA I NAČIN OBRAČUNA KOMUNALNIH TAKSI

Član 7.

(podnošenje taksene prijave)

Prijavu za razrez komunalne takse obveznik je dužan podnijeti Poreskoj ispostavi Visoko do 31. januara tekuće godine prema stanju na dan 01. januar iste godine za koju se razrez vrši.

Član 8.

(sadržaj taksene prijave)

Prijava za razrez komunalne takse podnosi se na obrascu KT 01 .

Prijava za razrez komunalne takse sadrži slijedeće podatke: naziv firme, sjedište i adresa taksenog obveznika, brojeve transakcijskih računa otvorenih kod banaka, broj poslovnih jedinica i veličina pravnog lica u smislu kriterija o razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine (Službene novine FBiH broj: 15/21) tarifni broj i iznos komunalne takse. Ukoliko poreski obveznik u propisanom roku ne podnese prijavu, umjesto njega prijavu će podnijeti Poreska ispostava Visoko u roku od 15 dana.

Član 9.

(umanjenje komunalne takse)

Komunalna taksa se plaća na svaku istaknutu firmu, oznaku, obilježje ili natpis na poslovnim prostorijama i objektima kojim se označava da određeno pravno ili fizičko lice obavlja djelatnost ili zanimanje u skladu sa Zakonom.

Za svaki organizacioni dio privrednog društva, prodajnog mjesta, ispostave, filijale i svih ostalih organizacionih oblika, taksa bi iznosila za svaki takav organizacioni dio 20% od iznosa propisanog za tu zonu.

Član 10.

(oslobađanje od plaćanja takse na istaknutu firmu)

Od plaćanja takse na istaknutu firmu oslobađaju se deficitarna zanimanja i tradicionalni zanati i to:

- Izrada predmeta od gline, slikanje na staklu, porculanu i keramici,
- Kovačka djelatnost,
- RTV mehaničarska,
- Kamenorezačka,
- Tapetarska, izrada drvene ambalaže, ukrasnih predmeta od drveta, izrada suvenira,
- Krojačka (muške, ženske odjeće) i izrada narodnih nošnji,
- Obućarska, saračko-remenarska, opančarska,
- Ručno pletenje, veziljska i izrada čipki, jorgandžijska, ćilimarska i vunovlačarska djelatnost,
- Sahadžijska
- Dimnjačarska
- Vodeničarska (uslužno mljevenje žita) na tradicionalan način
- Bojadisaone
- Brijačko-frizerska za muškarce,
- Proizvodnja drvenog uglja na tradicionalan način,
- Proizvodnja kreča na tradicionalan način,

- Izrada kora za pitu i tjestenine na tradicionalan način,
- Proizvodnja kolača isključivo po starim tradicionalnim receptima
- Hemijsko čišćenje odjeće,
- Štavljenje svih vrsta kože i krzna na tradicionalan način
- Izrada kožne i krznene galanterije i kožnih rukavica,
- Tašnarska – održavanje i popravak
- Taksi prijevoz – fizička lica
- Poljoprivredna proizvodnja
- Od obaveze plaćanja takse na istaknutu firmu
Oslobađaju se fizička i pravna lica – obveznici
 - a) Za prvu godinu poslovanja 100%
 - b) Za drugu godinu poslovanja 50% od ukupnog iznosa taksene obaveze

Član 11.

(osnovica komunalne takse)

Osnovica komunalne takse na istaknutu firmu je jedinstvena i iznosi 150,00 KM uz primjenu ostalih mjerila za utvrđivanje visine komunalne takse.

Član 12.

(koeficijent položajne pogodnosti)

Mjerilo za utvrđivanje komunalne takse je i koeficijent položajne pogodnosti.

Pod pogodnošću se podrazumijeva obim i stepen izgrađenosti i uređenosti i položaja zemljišta komunalnim građevinama i instalacijama, saobraćajne povezanosti, vrste i kapaciteta objekata za svakodnevno i periodično snabdijevanje, stepena pokrivenosti naselja objektima za zdravstvo, obrazovanje i kulturu i prirodnih uslova.

Koeficijent položajne pogodnosti utvrđen je zavisno o pogodnosti koje se obezbjeđuju obvezniku komunalne takse u zoni u kojoj je istaknuta firma odnosno u kojoj obavlja djelatnost.

Koeficijenti položajne pogodnosti po zonama utvrđuju se na slijedeći način:

I zona	1,35
II zona	1,30
III zona	1,25
IV zona	1,20
V zona	1,15
VI zona	1,10

Član 13.

(visina komunalne takse)

Mjerila za utvrđivanje visine komunalne takse na istaknutu firmu su koeficijent položajne pogodnosti, zona u kojoj je firma istaknuta, veličina pravnog lica u smislu kriterija o razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine (Službene novine FBiH broj: 15/21). Visina komunalne takse na istaknutu firmu za pravna lica određuje se množenjem jedinstvene osnovice komunalne takse na istaknutu firmu sa koeficijentom položajne pogodnosti i koeficijentom veličine pravnog lica u smislu kriterija o razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine, a visina komunalne takse za fizička lica određuje se množenjem jedinstvene osnovice komunalne takse sa koeficijentom položajne pogodnosti.

Koeficijent položajne pogodnosti određen je jedinstveno za sve vrste djelatnosti u tabeli tarifnog broja 1. Tarife komunalne takse po zonama grada Visoko u zavisnosti od pripadnosti određenog poslovnog prostora na kome je istaknuta firma u skladu sa Odlukom o građevinskom zemljištu općine Visoko. Koeficijent veličine pravnog lica u smislu kriterija o razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine određen je u tabeli tarifnog broja 1. Tarife komunalne takse sa oznakom (KV).

Prema odredbama Zakona o računovodstvu i reviziji Federacije Bosne i Hercegovine:

Mikro pravna lica su ona koja ispunjavaju najmanje dva od slijedećih uslova:

- prosječan broj zaposlenih je do 9
- prosječna vrijednost poslovne imovine na kraju poslovne godine je do 350.000,00 KM,
- ukupan godišnji prihod je do 700.000,00 KM

Mala pravna lica su ona koja na dan sastavljanja finansijskih izvještaja ispunjavaju najmanje dva od slijedećih uslova:

- prosječan broj zaposlenih u toku godine je do 49,
- prosječna vrijednost poslovne imovine na kraju poslovne godine je do 4.000.000,00 KM,
- ukupan godišnji prihod je do 8.000.000,00 KM

Srednja pravna lica su ona koja na dan sastavljanja finansijskih izvještaja ispunjavaju najmanje dva od slijedećih uslova:

- prosječan broj zaposlenih u toku godine je do 249.
- prosječna vrijednost poslovne imovine na kraju poslovne godine je do 20.000.000,00 KM
- ukupan godišnji prihod je do 40.000.000,00 KM

Velika pravna lica su ona koja na dan sastavljanja finansijskih izvještaja ispunjavaju najmanje dva od slijedećih uslova:

- prosječan broj zaposlenih u toku godine je 249
- prosječna vrijednost poslovne imovine na kraju poslovne godine je 20.000.000,00 KM
- ukupan godišnji prihod je 40.000.000,00 KM

Velikim pravnim licima smatraju se banke, mikro kreditna društva, društva za osiguranje i reosiguranje, lizing društva, društva za faktoring, društva za upravljanje investicijskim fondovima, društva za upravljanje dobrovoljnim penzijskim fondovima, berze, brokersko-dilerska društva i druge finansijske organizacije.

III TARIFA KOMUNALNIH TAKSI

Član 14. (tarifni brojevi)

Tarifni broj 1.

Za svaku istaknutu firmu, oznaku, obilježje ili natpis na poslovnim prostorijama i objektima, kojim se označava da određeno pravno obavlja izvjesnu djelatnost ili zanimanje, obračunava se i plaća se godišnja taksa množenjem jedinstvene osnovice komunalne takse na istaknutu firmu sa koeficijentom položajne pogodnosti i koeficijentom veličine pravnog lica u smislu kriterija o

razvrstavanju pravnih lica na osnovu člana 5. Zakona o računovodstvu i reviziji Federacije Bosne i Hercegovine (Službene novine FBiH broj: 15/21) kako slijedi:

KOEFICIJENT VELIČINE PRAVNOG LICA

KOEFICIJENT POGODNOSTI PO ZONAMA: I II III IV V VI

I – Pravna lica

r.b.	KOEFICIJENT VELIČINE PRAVNOG LICA	koeficijent položajne pogodnosti						
		I	II	III	IV	V	VI	*
1.	MIKRO I MALA PRAVNA LICA KV = 1,5	1,35	1,30	1,25	1,20	1,15	1,10	-
2.	SREDNJA PRAVNA LICA KV= 5	1,35	1,30	1,25	1,20	1,15	1,10	-
3.	VELIKA PRAVNA LICA KV= 10	1,35	1,30	1,25	1,20	1,15	1,10	-

II – Fizička lica (trgovačke radnje, ugostiteljske radnje, obrti i srodne djelatnosti)

Za svaku istaknutu firmu, oznaku, obilježje ili natpis na poslovnim prostorijama i objektima, kojim se označava da određeno fizičko lice obavlja izvjesnu djelatnost ili zanimanje, obračunava se i plaća godišnja taksa množenjem jedinstvene osnovice komunalne takse na istaknutu firmu sa koeficijentom položajne pogodnosti kako slijedi:

r.b.	FIZIČKA LICA	koeficijent položajne pogodnosti						
		I	II	III	IV	V	VI	*
1.	Trgovačke radnje, ugostiteljske radnje, obrt i srodne djelatnosti	1,35	1,30	1,25	1,20	1,15	1,10	-

Izuzev;

- Fizičkih lica koja su registrovana za pružanje usluga smještaja (tip: sobe u domaćinstvu, apartmani u domaćinstvu, kuća za odmor) i koja su dužna platiti taksu za isticanje firme u fiksnom iznosu od 50,00 KM bez obzira na zonu u kojoj je registrovana djelatnost;
- Fizičkih lica koja su registrovana za djelatnost Trgovina na malo ličnim radom – Trgovac pojedinac i koja su dužna platiti taksu za isticanje firme u fiksnom iznosu od 50,00 KM bez obzira na zonu u kojoj je registrovano sjedište djelatnosti.

Tarifni broj 2.

Za priređivanje muzičkog programa u hotelima i disco klubovima, plaća se dnevno – 50,00 KM, a u drugim ugostiteljskim objektima, plaća se dnevno – 10,00 KM, s tim da se za istu podnosi prijava poreskoj upravi najkasnije tri dana prije početka izvođenja muzike.

Tarifni broj 3.

Za privremeni boravak do 30 dana u objektima registrovanim za odmor i noćenja te kod građana koji izdaju sobe – ležaje turistima plaća se dnevno taksa u iznosu od 2,00 KM.

Obveznici iz prethodnog stava dužni su utvrđenu taksu obračunati i uplaćivati svakog prvog u mjesecu u korist računa komunalnih taksi za Grad Visoko. Od plaćanja takse oslobođena su lica predviđena članom 3. Uredbe o boravišnoj taksi (“Službene novine Federacije BiH”, broj: 23/96).

Tarifni broj 4.

1. Za postavljanje stolova, pultova i tezgi za prodaju ili reklamu roba i usluga, taksa se plaća po prodajnom mjestu (povremena prodaja) – dnevno 1,00 KM.

3. Za postavljanje zabavnih parkova (luna park) koje se vrše od mjesta do mjesta, taksa se plaća po m² zauzete površine – dnevno 0,50 KM.

Tarifni broj 5.

Za priređivanje zabavnih igara i igara na sreću plaća se taksa i to:

1. Za priređivanje zabavnih igara na bilijar stolovima, fliperima, automatima, pikadu i drugim sredstvima taksa se plaća 50,00 KM/godišnje po komadu,
2. Za priređivanje igara na sreću taksa se plaća 2.000,00 KM/godišnje po mjestu priređivanja.

Tarifni broj 6.

Za isticanje objava, oglasa i saopštenja na javnim mjestima plaća se jednokratna taksa i to:

1. Za seriju do 100 komada 50,00 KM,
2. Za seriju preko 100 komada 100,00KM,
3. Za postavljanje stalnih panoa i display-a po 1m² 10,00 KM. Istinja objava, oglasa i saopštenja na javnim mjestima vrši se u skladu sa odredbama Odluke kojom se tretira komunalni red na području grada Visoko.

Član 15.

(nadzor i kontrola prijave)

Nadzor nad provođenjem ove Odluke u pogledu prijave, obračuna i plaćanja takse, kao i prinudnu naplatu u slučaju neplaćanja vrši nadležna poreska uprava na području grada Visoko.

IV KAZNENE ODREDBE

Član 15.

(Visina kazne)

Novčanom kaznom u iznosu od 2.000,00 KM kaznit će se za prekršaj pravno lice koje u propisanom roku ne prijavi ili ne plati komunalnu taksu.

Novčanom kaznom u iznosu od 1.000,00 KM kaznit će se odgovorno lice u pravnom licu koje u propisanom roku ne prijavi ili ne plati taksu.

Novčanom kaznom u iznosu od 500,00 KM kaznit će se za prekršaj fizičko lice koje obavlja privrednu djelatnost koje u propisanom roku ne prijavi ili ne plati taksu.

V PRELAZNE I ZAVRŠNE ODREDBE

Član 16.

(Započeti neokončani postupci)

Svi slučajevi, odnosno postupci koji do dana stupanja na snagu ove odluke nisu pravosnažno okončani završit će se po odredbama ove Odluke.

Član 17.

(Stupanje na snagu)

Ova Odluka stupa na snagu prvog narednog dana od dana objavljivanja u “Službenom glasniku Grada Visoko”, a primjenjivat će se od 01.01.2022. godine.

Stupanjem na snagu ove Odluke prestaje da važi Odluka o općinskim komunalnim taksama („Službeni glasnik općine Visoko“ broj: 5/12, 12/17,12/18, 05/19).

Broj: 01/1-02-702/21

27.12.2021. godine

V i s o k o

PREDSJEDAVAJUĆI
Gradskog vijeća Visoko
Nikola Pekić